



**BOSNA I HERCEGOVINA  
FEDERACIJA BOSNE I HERCEGOVINE  
ZENIČKO-DOBOJSKI KANTON  
OPĆINA TEŠANJ  
OPĆINSKI NAČELNIK**

Datum: 01-05-6-497/19

Broj: 25.04.2019.godine

OPĆINSKO VIJEĆE TEŠANJ

**PREDMET:** Mišljenje, dostavlja se.-

Općinskom vijeću je Općine Tešanj od strane Kluba vijećnika Stranke za Bosnu i Hercegovinu Općinskog odbora Tešanj dostavljen Prijedlog Odluke o izmjeni Odluke o nazivima i označavanju ulica, trgova i označavanju objekata brojevima na području Općine

U skladu sa Članom 46. stav 2. Poslovnika o radu Općinskog vijeća Tešanj ("Službeni glasnik Općine Tešanj, broj: 3/18) dostavljamo slijedeće

### MIŠLJENJE

Član 1. predložene Odluke kojim se mijenja raniji član 2. stav 1. Odluke o nazivima i označavanju ulica, trgova i označavanju objekata brojevima na području Općine Tešanj ("Službeni glasnik Općine Tešanj", broj: 3/15, 2/16 i 4/17) smatramo **neprihvatljivim**, budući da je u postojećoj Odluci član 2. stav 1. jasan i odnosi se na područja (poštanska područja, ne na naselja ili mjesne zajednice). Dodavanje teksta; "*Miljanovci i Novi Miljanovci*" ne bi bilo u skladu sa članom 2. važeće Odluke. Ulice su imenovane i u naseljenim mjestima Raduša, Dobropolje, Bukva, Jevadžije, Rosulje, Jelah Polje i prema postojećoj Odluci se mogu imenovati u bilo kojoj mjesnoj zajednici. Nijedno od tih naseljenih mjesta nije nabrojano u članu 2 jer je riječ o područjima. Prijedlog dopuna člana 2. sa dva naseljena mjesta, osim što je pogrešan zbog suštine napravio bi veći problem zbog izostavljanja drugih naseljenih mjesta koja trenutno imaju imenovane ulice ili dijelove ulica, a dugoročno bi općina trebala svaki put kada imenuje ulicu u nekom naseljenom mjestu mijenjati član 2 Odluke, te na kraju nabrojati svih 42 naseljena mjesta.

Obuhvati ulica su jasni i precizni, što potvrđuje i **član 2. stav 3. važeće Odluke, u kojem je navedeno da su sastavni dio Odluke grafički prilozi, na kojima su vidljive granice ulica, budući da su iste određene poligonom ulica. Prilikom definisanja navedena tri područja, u obzir je uzeta i postojeća podjela na poštanska područja Tešanj, Jelah i Tešanjka, koja se svakodnevno koriste u poštanskom saobraćaju.**

Članovi 3. i 4. predložene izmjene Odluke smatramo da su nepotrebni, budući da su Članom 3. stav 1. tačka 41. i 46. važeće Odluke precizno opisani početna i krajnja tačka navedenih ulica Braće Omerbašić i Put Bege Jacića. To je i dodatno precizirano u članu 2. stav 3. važeće Odluke (jer je Vijeće osim tekstualnog opisa svojom ranijom Odlukom prihvatilo grafički prikaz obuhvata ulica). **Sve ulice koje je Općinsko vijeće imenovalo i u projektu Adresnog registra označilo imaju preciznu kartu i pisanje ovakvim ili onakvim riječima ne mijenja suštinu. Na sličan način bi se mogao svake sjednice Vijeća mijenjati način opisa bilo kojeg dijela granice i svako od nas bi to mogao opisati na svoj način.**

Tekstom koji je predložen je samo drugačiji tekstualni način opisa već postojećeg poligona ulica koji je utvrđen ranijom odlukom. Napominjemo da je važniji i precizniji grafički dio odluke i da opisivanje ovim ili onim riječima ništa ne mijenja.

Na kraju, **iz obrazloženja** predložene Odluke da se zaključiti da se Inicijativa za izmjenu Odluke javila zbog nepreciznosti ili netačnih podataka u bazi CIPS (pribavljanje potvrde o prebivalištu), pa i adrese poslovnih subjekata. Očito je riječ o nedovoljnom poznavanju ili lociranju stvarnog problema.

Podaci i evidencija CIPS-a po pitanju adrese bilo koje osobe su uneseni u službene evidencije na osnovu iskaza podnosioca zahtjeva, bez pojedinačne provjere. Slično je i sa Registracionim sudovima, kod registracije poslovnih subjekata. Registar koji se nalazi pri Općinskom sudu u Zenici ne ulazi u vjerodostojnost upisanog "sjedišta" firme, jer zahtjev za registraciju, preregistraciju i izmjenu sjedišta podnosi vlasnik firme ili njegov zastupnik dostavlja odluku o promjeni sjedišta subjekta upisa u Članom 39. Zakon o registraciji poslovnih subjekata u Federaciji Bosne i Hercegovine ("Službene novine Federacije BiH", broj: 27/05, 68/05, 43/09 i 63/14).

Osim ovih evidencija, podaci o adresama postoje kod Komunalnog preduzeća Rad (za slanje računa), BH Pošte, BH Telekom, Elektroprivrede itd. Oni svoje podatke nisu formirali na osnovu karata iz Odluke Općinskog vijeća, nego na različite načine. Ako kod ljudi nastaje zabuna jer im na nekim računima piše ovako ili onako, onda tu stvar treba rješavati na pravoj adresi. Neke od ovih baza podataka nisu precizna ili su podaci kontradiktorni i to proizvodi zabunu.

Podaci u Adresnom registru odgovaraju stvarnom stanju na terenu u pogledu granica/definisanih ulica i naseljenih mjesta/, što se može vidjeti u svakoj Potvrdi o kućnom broju. Dakle, svaki građanin na prostoru općine može tražiti podatke iz Adresnog registra, tj. potvrdu o kućnom broju, koja sadrži podatak o naseljenom mjestu, katastarskoj općini, katastarskoj čestici, ulici i kućnom broju. Time svako može i provjeriti da li se ovi podaci slažu sa stvarnim stanjem. Svako pojedinačno može sa takvom potvrdom o kućnom broju tražiti usklađivanje podataka kod CIPS-a, Registracionog suda i bilo koje druge institucije.

Postoji više slučajeva u kojima jedna ulica prolazi kroz više naseljenih mjesta, ne samo pominjane dvije ulice. Pored ulica "Put Bege Jacića" i "Braće Omerbašić" koje se nalaze u dva naseljena mjesta, su i Ulica Senada Hodžića, Ulica Patriotske lige i Ulica Put Jelaškog odreda. Ni u jednom od slučajeva nije došlo do pomjeranja granice naseljenog mjesta (što bi možda proizvelo i promjenu granice MZ). Inicijativa se ne bavi uopće drugim slučajevima!

Izvršili smo dodatne provjere u Adresnom registru za ulice pomenute u Inicijativi i predloženoj izmjeni Odluke. Smatramo da u uspostavljenom Adresnom registru i Odlukama na kojima se zasniva nema zabune. Svako može pojedinačno provjeriti svoju adresu i time ukazati ako postoji neki problem. Svako pojedinačno može sa takvom potvrdom o kućnom broju tražiti usklađivanje podataka kod CIPS-a, Registracionog suda i bilo koje druge institucije.

**Slijedom svega naprijed izloženog, Mišljenja smo da bi bilo pogrešno usvajanje ovakve Izmjene i dopune Odluke o nazivima i označavanju ulica, trgova i označavanju objekata brojevima na području Općine Tešanj ("Službeni glasnik Općine Tešanj", broj: 3/15, 2/16 i 4/17) jer važeća Odluka ne sadrži kontradiktornosti i potpuno je jasna u primjeni.**

U prilogu, radi lakšeg razumijevanja dostavljaju se:

- Pregled Ulica - I
- Pregled Ulica - II
- Pregled Ulica - III
- Područje Tešanj- prikaz ulica Senada Hodžića, Patriotske lige i Izudina Alićehajića, gdje je vidljivo da iste prelaze granicu naseljenog mjesta Tešanj i ulaze u naseljena mjesta Raduša, Bukva i Dobropolje,
- Područje Jelah - ulica Jelaških brigada, Put Bege Jacića i Braće Omerbašić, gdje je vidljivo da iste prelaze granicu naseljenog mjesta Jelah Polje, Novi Miljanovci i Miljanovci,
- Izvod iz popisa parcela iz katastra, izvod iz baze podataka Adresnog registra, Grafički prikaz i tekst Potvrde o kućnom broju za nekoliko objekata iz ulica koje se nalaze u više naseljenih mjesta.

**OBRADIVAČ:**

**Služba za katastar, urbanizam  
i imovinsko-pravne poslove**

NADIR Medarić, dipl. ing. geodezije

**OPĆINSKI NAČELNIK:**

Mr.šci. SUAD Huskić